

* * *

Ертеңіне еліне қайтып келе жатып Тұрдекең бүкіл жол бойы ойлы қалыпта отырды. «Заман қалай өзгереді! — деп толғанады қария. — Бүгін тұлдыр жоқ құтымның қу шоқысына ертең ел қонып, мал мыңғырып, жарқырап қала салынып қалады! Бұрын, біздің заманымызда, мұндай істі істеу мүмкін бе еді? Елдің көсегесінің көгергені, іргесінің мықтап бекігені, шаңырағының қол жетпестей болып биіктегені емес пе бұл! Бұрынғылар «Елу жылда ел жаңа» дейтін, қазір елу жыл емес, төрт-бес жыл ат ізін салмай, көз жазсаң, елді де, жерді де танымай қаласың. Ғажап қой, ғажап!.. Осының бәрі ненің арқасы? Барлықтың, байлықтың арқасы. Ненің белгісі? Іргеліліктің, кендіктің, болашағы зорлықтың белгісі. Соны түсініп, мерей тұтып, ана өздеріне жасалып жатқан өлшеусіз қамқорлықты бағалап, істелуі керек іске білекті сыбанып жіберіп жұмыла, жан аямай кірісетін жастардан айналсаң болмас па! Ойлап, қарап отырсаң, бұлар да кешегі күннің жастары емес. «Әуелі әйтіп алайын, бүйгіп алайын» демейді, «Біздің күшіміз тау қопаруға да жетеді, ал жеке бастың мүддесі өзінен өзі біте жатады» дейді... Ылайымда осылай бола берсін, тыныштығыңнан айырма, Жасаған!..»

Өзінің өткен кезін, көрген бейнеті мен тартқан азабын бүгінгі қойшының өзі кешелі-бүгін қуә болған тірлігімен салыстырып еді, Тұрдекеңнің көкірегін зіл басты. «Тек менің емес, мен қатарлылардың бәрінің дерлік қайраты тасқа тиді ғой; заман солай болды, оған келіп соғыс қилікті... Бірақ біз де ғұмырымызды пайдасыз кешкеніміз жоқ: бүгінгі Рабиғалардың қолындағы мал — сол біз баққан тұяқтың жалғасы. Малға мұрагер болды, енді олар біздің білігімізге де мұрагер болуға тиіс. Бүгінгі таяқсыз қойшының, біле білсе, бізден, кешегі таяқты қойшылардан, қарттардан, үйренері көп! Тіршіліктің заңы сол — білік, тәжірибе, ақыл-парасат қай кезде де атадан балаға мұра, ол үзілмейді, жалғаса береді. Мұның зор мәні бар: пенде үшін ең орны толмайтын өкініш — төккен тердің өкініші, ең үлкен зейнет — еткен еңбегіңнің жанғаны. Құмға сіңген су сияқты, із-түзсіз кеткен терден сакта, Жаппар ием!..» деп келеді қария.



Тңір қараңғысы еді

Естөре қызметтен үйіне шаршап-шалдығып әрең келе жатқан. Театрдың тұсынан өте бергенінде соңына ұзын шашын бос жіберген, көзіне сүрме салып қиғаштаған, екі тізесі шолақ етегінен шығып жалтылдаған бір аршын төс сұлудың ілескенін байқап, елең етті.

Жарнамаларды шолу ниетімен мойын бұрып еді, әлгі жас адамның сиқырлы бейнесі ол мақсатын ұмыттырып жіберді.

Қырмасақал, сұр бойдақтың жүрегі кенет тақым тимеген асау тайша тулап кетіп еді. Бозбала кезі болса, мұндай сылқым сәтте әп дегеннен әзіл айтып, бойжеткеннің бітісінен, жүріс-тұрысынан мін тауып, өз нарқын көтеруге, оның нарқын төмендетуге тырысар еді. Қазір өйте алмады, оған шамасы келмеді. Шетке тартып, елемегенсіп, қашқақтай берді. Әйткенмен, өзін-өзі аяп та, бойжеткен соңыма ілесе бергей еді деп тілеп те келеді. Өзінің қазіргі күйі ұлы дүбірден әлдеқашан қалып, балаға ермекке мінгізіп қойған кәрі сайгүліктің амалсыздан тапырақтай қосаяқтап бара жатқанындай болып елестеді. Көңілін мұң торлап, өкініш тұмшалады. Сол сәт өзінің бүкіл ғұмыры еш қуанышсыз, мақсат-межесіз әлгідей тұрлаусыз шабыс беделінде өтіп кеткендей көрініп, мықтап қамықты.

Кенет оның көңілінде шұғыл да парықсыз тілек туындады.

«Мың да бір шүкір, мың да бір шүкір!». Соңындағы кебіс тықылы әлі үзілген жоқ!

«Бүгінгінің сұлуына ең алдымен гүлжазира тұрмыс — кірсең шыққысыз, жасауға малынған жай, төбесі мен екі қапталы ертегілерде сипатталатын тұлпарлардың сауырынша төңкерілген машина керек. Сормандай болғанда, менде соның ешқайсысы жоқ...» деп келеді.

Осы жасының ішінде бұл не тындырды, не бітірді?

Ештеңе тындырған жоқ, еш нәрсе бітірген жоқ. Бастан кешкен қыруар жасының жиырма жылдан астамы тізіліп тұрған ылғи категе толы, ауа жайылумен өтіпті.

Алғашқы қатені бұл, орта мектепті сүйретіліп әрең бітіргеніне қарамастан, институтқа түсемін деп жіберді. Ары мен жанын сары-ала етіп, зорға ілікті, солай оқыды да. Оқығаны құрысын, басқалар бір қарап ұғатын нәрсенің сұлбасын бұл он қарап әрең елестетті, басқалар үш

күн дайындалып, тапсыра салатын сынақты бұл үш күннен бес рет дайындап, өлдім-талдым дегенде зорға өткізді. Сөйтіп итқорлықпен тәмамдады жоғарғы оқу орнын.

Құба-құл, бұл осымен тұрсын. Ең болмаса, енді өмірден сабақ алуы, өз шама-шарқын мөлшерлеуі керек емес пе еді? Әлгідей қиындықпен қолға түскен дипломның қызығын көруі керек емес пе еді?... Керек-ақ еді, бірақ бұл өйтпеді – бұл екінші рет шалыс басты аяғын, екінші рет ойсыраған қате жіберді.

Естөремен институтта қатар оқыған жігіттер қазір, қағанағы қарық, сағанағы сарық, кең даланы еркін жайлап отыр. Тұрмыстары тұрмыс сияқты, қызметтері қызмет сияқты. Шетінен үй салды, қатын алды, алды жеті-сегізден, соңының өзі үш-төрттен бала сүйіп үлгерді. Баспаналарының айналасында малдың шуы үзілмейді, көңі мен қиы арылмайды. Білімі саяздарының да табандары күректей – біреуге сес көрсеткісі келсе, кіші-гірім жаялықтай дипломдарын суырып-суырып алады; инабат та соларда, сый-құрмет те соларда.

Естөренің бір кезде алқалы жиында әрбір жеке адамның бақыты жайлы қызу айтысқа куә болғаны бар. Келісімге келе алмай қызылөнеш болғандарға сол жердің тұрғыны, көпті көрген қария билік айтқан. «Қарақтарым, елдің көбі басқа келген бақыт дегенді мал-жанның амандығы, іргенің бүтіндігі, көңілдің тұтастығы деп біледі. Ондай түсінігі барларға сендер тиіспендер, не шаруаларың бар – өздеріңе де жеңіл, оларға да тыныш» деген. Мұның орын теуіп, сол жерден табан аудармастан тұрақтап қалған жолдастары да әлгідей өздерінше бақытты жандар екен дағы.

Ал Естөре қайтты? Иә, бұл өйтпеді. Қызмет біткен олқы, табыссыз көрініп, бір жерде тиянақтай алмай сырғанап жүрді де, ақыры қалаға тартты. Қолы көтере алмайтын шокпарды беліне қыстырып, ғылымды екі ақымақтың бірі күршітіп сауып рақатын көретін сауынды сиыр деп ұғатындардың дақыртымен, «ғалым болуды» аңсады. Сөйтіп, осыдан он жыл бұрын қазір өзі қызмет істеп жүрген институтқа орналасты.

Ұзамай, тағы да сол баяғы ит қорлықпен, аспирантураға түсті. Күні-түні армандағаны, алдына қойған жалғыз мақсаты – кашан болмасын, қай кезде қолы жетпесін мейлі, фамилиясының ылғи алдында жүретін «ғылым кандидаты», «доцент» деген атауларды көріп, есіту еді. Ол арманына күні бүгінге шейін адал еді, соңына мына бойжеткен түскен сәт туғанша алаңсыз қарап еді.

Ғылыми дәрежеге, атаққа бағзы біреулердің бойындағы қабілетіне қарап емес, күнкөріс қамымен ұмтылып жатқанын, оны алып алғаннан кейін де әлгілердің көбінің сол баяғы дүмбілез қалпында қала беретінін көре жүрсе де, елдің тіпті ауылдағы қара шаруаға шейін «тәленше

кандидаттық қорғап алыпты» деп аузының суы құритынына куә Естөре: «Шіркін, ел мен жайлы да соны айтса!» – деп армандады. «Не тындырамын сонда?» деген сауал мұның ойына келген жоқ. Дарынды, қабілетті, ғылымға шын ниетімен ұмтылып, адал тер төккен адамға атақтың өзі келетінінен де, тайыз, топыраш, қабілет қанаты тапшы адамның соңына түсіп, ары мен адамшылығын аяққа таптатып қуалайтынынан да, боскеуде, данғаза мансапқұмардың жылтырақ тағып жүрмесе көңілі көншімейтінінен де, ондайлардың әлгі арманы орындалғаннан кейін ештеңе істемей, миығынан күліп, «Енді сені ит жесін, ғылым болып дамымасаң, атамнан әрі!» дейтінінен де ол кезде мұның бүгінгідей хабары болған жоқ. Қолға іліктіру ондай сияқты көрінген олжа қайдасың деп, бұл да қойып кетті. Өзін таза, кеудесін, арын биік ұстайтын адам үшін басқа біреудің атын атарда қосарланатын, ергізде бітіп болмайтын шені мен шекпенінің тізімі күдік туғызып, қоңырқай сезім шақыратынын бұл қайдан білсін. Сөйтсе, өмірдің қарапайым заңы – өту-өтпеуі екі талай нәрсе ғана ерсі көп мақталады екен ғой! Мұндай жайлардың көбін Естөре енді, жүре, көре келе ғана, түсіне бастады. Әйткенмен, өтірік көлгірсіп керегі не, тура қазіргі сәтке дейін қалаған соқпағына байланысты өкініші болған жоқ, санын мұншалықты опына соққан жоқ.

Аспирантураны бұл бітіре алмады. Бітірді-ау, бірақ тек әншейін құр мерзімін ғана өтеп тынды. Бәлен жылын сарп еткен диссертациясының қорғалар мерзімі ғылыми жұмыстарға қойылатын талаптың өзгерген, өскен кезімен түспалдасты да, еткен еңбегі зая кетті. Пысықтық салуға ниеттеніп еді, онысынан ештеңе өнбеді.

Міне, содан бері Естөре өзін адам санатында сезінбейді. Жанбаған талаптың бықсық отының ішті өртейтініне күмән жоқ. Бұл жолы да солай болды – айналасына қақпанға түскен қасқырша өшпенді көзбен қараған Естөре көпке дейін елдің бәрін алаламастан сыпырта жек көрді. Қазір енді ол сезімі біраз саябырсыды.

Өмірдің ылғи алға тартар көп тәжірибесінен, сабағынан әркімнің түйін қалары, көңілге тоқыры әр түрлі ғой – біреудікі көп, екіншінікі аз. Елдің бәрі бірдей одан тағлым ала береді деу – ағаттық. Әсіресе қыңыр кеткен іс біреудің көңілін өрге сүйресе, екіншіні кейін тартады. Естөре де өзінше тұжырымдады. «Өткен іс өтті, бәрі де ештеңе емес, – деп, сол баяғы бағытында ойлап келе жатыр қазір де. – Енді... бір жас адам көлгірсімей шын сенім көрсетіп, қол артса, тағы да қимылдап көрер ем – қуаныштың қанатына мініп, ғылым есігін қайта қағар ем...»

Естөре бойжеткеннен тым озып кетуден қорқып, жүрісін сәл тежеп еді, соңынан жанға жағымды тырсыл қайта естілді. Мұның жүрегі де сол атойлауымен келеді. «Бергеніне шүкір!..» дей жаздап, шақ қалды...

Аспирантураны тәмамдауына аз мерзім қалғанда Естөре үшінші ойсыраған қате жіберді – институт кафедраларының бірінде лаборант болып істейтін сұлу бикеш Фатимаға тағы сөз салды. Бір ғажабы – бұрын талай рет мұның ыстық ықыласына мұрын шүйіріп, қыңыр қарап келген, жалпы жүрегінде жылу аз сурет-сұлу Фатима әлгі жолы тосын мінез танытты – жігітке өзінің де «өле ғашық» екенін айтып, құшақ жайды. «Неге бұлай?!» деп шұғыл өзгерістің астарына үңілген Естөре болмады, жедел той қамына кірісті. Сөйтіп, аз мерзімде Фатимаға үйленіп тынды. Бойжеткеннің айналасындағы өртіне лаулаған өсекке де көңіл бөлген жоқ.

Кешікпей Фатима ұл бала туды. Әйтсе де, бұл лекер шаңырақтағы бакыт шырағы ақыры сол жанбауымен қалып еді. Естөренің бұрынғыша қатардағы оқытушы қалпында қала беретініне көзі әбден жеткеннен кейін Фатима да өзгерді – тұнжырай қарсы алып, тыжырына шығарып салатын әдет тапты. Ол ол ма, келе-келе, оңаша демеді, жұрт көзінше демеді, былғаныш сөздермен балағаттап, мұның аз ғана абыройын айрандай төкті.

Фатиманың айналасындағы толастай бастаған өсек-аяң қайта өршиді. Ақыры ол Естөреден ірге ажыратты да, ел көзінше бірер жыл салт отырғаннан кейін, соның алдында ғана әйелі өлген, өзі қызмет ететін кафедраның меңгерушісіне тиіп алды. Содан бері ол әйелдің уақыты Естөреден де көп сақа байының көзіне мүләйімсі қараудан артылмай жүр деп есітеді бұл. Өзінің «елден ерек бакытты екенін» әлгідей жүлік дарақылықпен көрсетуге тырысатын сияқты. Әрине, бакыттан құралақан емес: шалдың балаларының бәрі әлдеқашан ер жеткен, бөлек тұрады, қыздары да салмақ салмайды; Естөренің лекер табысының төрттен бірін Фатима және алып отыр...

Әсіресе осы соңғы соққы Естөрені есеңгіретіп кетіп еді. Көп уақыт жүнжіп, тұнжыраумен, бауырын жаза алмай бүктетілумен күн кешті. Сондағы бар қайраты баяғыша «Бәлем оң мен солымды қарап, енді опынбастай болып тақырып таңдап, жетекші тауып алайын, – әлі көрерсіңдер менің кім екенімді!» деуге ғана жеткен. Енді, міне, соңында тобығы сыртылдап, бір періште келе жатыр. Төбеден түскен перизат – шын бакыт құсы емесіне кім кепіл бола алады? Мезгіл болса, әлі көз көрместей қараңғы емес, сондықтан мұның порымын дұрыс ажыратпай, кейін өкінуі мүмкін бе? Міне, бес қана адым – кейін де қалмайды, ілгері де озбайды. Бұл жүрісін тездетсе, ол да тездетеді, тежесе – тежейді. Демек, бойжеткен мұны сыртынан көптен бері бағып, ұнатып, ұрымтал сәтті күтіп жүрген болды. «Айналып кетейін қазіргі заманның салты-ай... қыз жігітке өзі сөз салса, несі айып? Иә, сәт!..»

Үйі бар (Естөре тыжырынып қойды: «Бір бөлме де үй боп па?!»), азды-көпті жиған мүлкі бар («Ылғи ескі-құсқы!»), тырнақтап, тиынды тиынға қосып құраған қаржысы бар («Айтудың өзі ұят: мың жарым ғана сом!»).

Естөре кенет селк етті.

– Ағай, аз уақытқа кідірмес пе екенсіз? – деп еді оның соңында келе жатқан бойжеткен, даусын сыңғыр еткізіп.

«Ағай»?! Неге «ағай»? Бұлай атамауы керек еді ғой!..

– Не дедіңіз... қарындас?... – «Жүрегі құрғыр да бітіпті-ау!» Естөре тоқтай қалды.

Осыдан кейінгі бір жарым – екі минутты ол ешқашан ұмытпай, өлгенше еске алатын шығар!..

– Сізден Мишаның хал-жайын сұрамақ ем, – деп еді бойжеткен. Ұяла төменшіктеп, аяғының астына қарап кетті. Екеуі енді өте жақын тұрған, «Хас сұлу екенсің ғой, қарағым-ай!» деді бұдан кейін не боларын анық тұспалдап, жүрегі сыздай жөнелген Естөре іштей. – Сіз тіпті жеткізбей қойдыңыз... – дейді қыз. – Миша екеуміз мектепте бір класта оқып ек. Көптен көрінбей кеткен соң себебін сізден сұрап білейін деп...

– Ол кім еді? – Естөренің даусы қалтырай шықты.

– Манарбек ше?! Плодоовощнойдың электромонтеры ше?... Сіздің ініңіз емес пе еді?... «Жоқ»?! Ғажап, ол сізге керемет ұқсайды!.. Кейінгі кезде ішіп жүретін еді, содан қорқып... Кешіріңіз!..

Бойжеткен бетін басып, көлденең өтетін көшеге бұрылды да, асфальт бойлай тақылдата жүтіріп, көзден ғайып болды.

... Өзін адам да, ит те емес, тозаң сияқты сезінген Естөренің көшені басына көтере өкіріп жылағысы келді. Көп нәрсені ол енді ғана, осы қас қағымда, өкініштісі сол – өте кеш түсінді. Тура қазір тағдыр бұдан: «Не қалайтыныңды айт, бір тілегінді орындайын», – деп сұраса, бұл әуелден мұның пешенесіне жазылмаған жер-көктегі лауазым-атақтың бәрін мансұқ етіп, он сегіз – жиырма жасын қайырып алар еді де... аз уақытта курсың бітіріп, іргедегі жеміс-жидек совхозына барып, электр желісінің қатардағы күтушісі болып орналасар еді...